

SENSE

Antifone di jentrade At 1,11

Umign di Galilee, parcè po staiso li a cjalâ il cîl?
Come che lu vêts viodût a lâ sù viers il cîl,
cussì al tornarà, aleluia.

Si dîs Glorie a Diu.

Colete

Diu onipotent, fasinus gjoldi di sante contentece
e cuntun agrât plen di religion,
parcè che la sense di Crist to Fi e je ancje la nestre
e là che e je rivade la glorie dal cjâf,
li al è clamât a sperâ ancje il cuarp.
Pal nestri Signôr Jesù Crist to Fi, che al è Diu
e cun te al vîf e al regne dutune cul Spirtu Sant,
par ducj i secui dai secui.

O ben:

Diu onipotent, a nô che o crodìn
che come vuê il to Unigjenit e nestri Redentôr
al è lât sù intai cîi;
danus, par plasê, di vivi ancje nô là sù cul nestri cûr.
Lui che al è Diu
e cun te al vîf e al regne dutune cul Spirtu Sant,
par ducj i secui dai secui.

PRIME LETURE At 1,1-11

Si è alçât par aiar sot i lôr vòi.

Dai Ats dai Apuestui

Tal gno prin libri, Teofil, o ài tratât di dut ce che Jesù al à fat e insegnât, di cuant che al à scomençât fin in chê dì che al è stât puartât sù in cîl, dopo di vêur dât lis sôs istruzions ai apuestui che ju veve sielzûts midiant dal Spirtu Sant.

Dopo de sô passion, lui si è pandût a lôr vîf, cun cetantis provis, comparintjur par cuarante dîs e fevelantjur dal ream di Diu. E biel che al mangjave cun lôr, ur à comandât di no slontanâsi di Jerusalem ma di spietâ li ce che il Pari ur veve imprometût, «ce che o vêts sintût, dissal, de mê bocje: Zuan al à batiât cu l'aghe, vualtris invezit o sarêts batiâts cul Spirtu Sant di chi a pôcs dîs». Cjatantsi duncje insieme, i àn domandât: «Signôr, isal chest il temp che tu tornarâs a meti in pîts il ream di Israel?». Ur à rispuindût: «No us sta a vualtris di savê i temps e i moments che il Pari si à riservât par sè. Ma o cjaparêts la fuarce dal Spirtu Sant che al vignarà parsore di vualtris e mi sarêts testimonis a Jerusalem, par dute la Judee e la Samarie e fin ai ultins confins dal mont».

Disint cussì, si alçà par aiar sot i lôr vòi e un nûl ur al strafuì dai lôr vòi. Instant che lui al leve sù, lôr a cjalavin fis il cîl: e ve che si ur presentin dôs personis a blanc che ur disin: «Umign di Galilee, parcè po staiso li a cjalâ il cîl? Chel Jesù che us è stât strafuît viers il cîl, al tornarà come che lu vêts viodût a lâ sù in cîl».

Peraule di Diu.

SALM RESPONSORIÂL dal Salm 46

R. Al va sù il Signôr fra cjantis di gjonde.

O ben:

R. Aleluia, aleluia, aleluia.

Batêt lis mans, popui de tiere,
scriulant al Signôr in ligrie.

Parcè che trement al è il Signôr des schiriis, l'Altissim,
lui al è il grant re sun dute la tiere. **R.**

Al è lât sù Diu framieç dai berlis,
il Signôr compagnât dal sunôr de trombe.
Dait sù cjantis a Diu, dait sù cjantis;
dait sù cjantis al Signôr, dait sù cjantis. **R.**

Lui al è il re di dute la tiere:
une biele cjante dait sù a Diu.
Diu al à tacât a regnâ sui popui,
Diu si è plaçât su la sô sante sente. **R.**

SECONDE LETURE Eb 9,24-28;10,19-23

Crist al è jentrât tal cîl.

De letare ai Ebreus

Crist nol è jentrât tun santuari fat de man dal om, spieli di chel vêr, ma adiriture tal cîl, par presentâsi denant di Diu pal nestri ben, e no par ufrîsi sè plui voltis, usance il prin predi che al jentre tal santuari ognî an cul sanc di chei altris. In chest câs, di fat, al varès scugnût patî plui voltis de creazion dal mont in ca. Cumò invezit al è comparît une volte sole, cuant che i temps a jerin al colm, par parâ jù il pecjât midiant dal so sacrifici. E come che al è destinât pai oms che a muerin une volte sole, e dopo al ven il judizi, cussì Crist, dopo di jessisi ufiert une volte par dutis cul fin di parâ jù il pecjât di cetancj di lôr, al tornarà a pandisi une seconde volte, cence nissun rimpin cul pecjât, a di chei che lu spietin, par salvâju.

Vint duncje, fradis, plene libertât di jentrâ tal santuari midiant dal sanc di Jesù, par cheste strade gnove e vive che le à screade par nô a traviers dal vêl, vadî de sô cjar, vint un grant predi sore de cjase di Diu, svicinìnsi cuntun cûr sclet e plens di fede, cui cûrs smondeâts di une cussience triste e cul cuarp lavât cun aghe monde. Mantignìn cence clopâ la profession de nestre sperance, parcè che chel che al à imprometût al è di peraule.

Peraule di Diu.

SECUENCE: SUMMI TRIUMPHUM REGIS

Compagnìn la vitorie dal re cu la nestre laude;
lui che, cu la vitorie de justizie, al à tes sôs mans i bastons
dal comant dal cîl e de tiere,
lui che si è dât vie a un presit une vore grant
par riscatâns nô.

A lui i spiete un non convenient e gloriôs.
Di fat al à scjavaçât cence soste dutis lis monts
e dutis lis culinis di Betel.
Dal cîl al è dismontât jù intun grim virgjinâl
e di li tal grant mår dal mont.

Dopo di vêlu navigât dut cu la sô potence,
al à dât l'assalt al scûr trement dal flum dal infier.
Al à savoltade la paronance di chel potent;
al à gjavât fûr di li une grande schirie di int
e cul so sflandôr al ilumine il mont.

Il vincidôr al à menade daûrsi la sdrume
di chei che a jerin tignûts presonîrs li dentri,
e cussì, tornât in vite, al pues aromai palesâsi
ai siei servidôrs e amîs.

Vuê infin al à fat il salt plui grant,
svolant par simpri sore dai nûi e dai cîi.

Il popul fedêl che al celebri duncje cheste grande zornade
là che il Fi di Diu al à fat jentrâ cun lui,
tes altis sentis dal cîl, i cuarps dai mortâi.

La int e spiete trimant il judiç che al vignarà,
come che i doi agnui ur àn spiegât ai fradis.
Chest Jesù che us è stât puartât sù in cîl,
al tornarà a vignî, come che lu vês viodût a lâ.

Suplichìn alore ducj insieme cence mai fermâsi
il Signôr nestri gloriôs;
par che de diestre dal Pari, là che al è sentât,
nus mandi il Spiritu Sant.
Che al sedi simpri cun nô, fin a la fin dal mont.

CJANT AL VANZELI Mt 28,19.20

R. Aleluia. Aleluia.

Lait e inscuelait dutis lis nazions, al dîs il Signôr.
Ve che jo o soi cun vualtris ducj i dîs,
fin a la fin dal mont.

R. Aleluia.

VANZELI Lc 24,46-53

Intant che ju benedive, al vignive puartât sù in cîl.

Dal vanzeli seont Luche

In chê volte, Jesù al disè ai siei dissepui: «Cussì al è scrit: Il Crist al scugnive patî e la tierce dì risussitâ dai muarts; tal so non si predicjarà a ducj i popui la conversion e il perdon dai pecjâts. Vualtris o sarêts testimonis di dut chest, scomençant di Jerusalem. E ve che jo o mandarai sore di vualtris chel che il Pari gno al à imprometût. Vualtris però restait in citât fintremai che no sarêts rivistûts di une fuarce che e ven di adalt».

Po ju menà fûr des bandis di Betanie e, alçant lis mans, ju benedì. Intant che ju benedive, si distacà di lôr e al vignive puartât sù in cîl. E lôr, dopo di vêlu adorât, a tornarin a Jerusalem cun grande contentece. E a jerin simpri tal templi a laudâ e a ringraciâ Diu.

Peraule dal Signôr.

Si dîs O crôt.

Su lis ufiertis

Signôr, ti presentîn cun umiltât chest sacrifici
in memorie de sense venerabil di to Fi;
danus la gracie che, cun chest incuintri di robis santis,
o podîn jessi alçâts a lis realtâts dal cîl.

Par Crist nestri Signôr.

Antifone a la comunion Mt 28,20

Ve che jo o soi cun vualtris ducj i dîs,
fin a la fin dal mont, aleluia.

Daspò de comunion

Diu onipotent e eterni,
che tu nus lassis celebrâ i misteris dal cîl
biel che o sin ancjemò su la tiere, fâs, par plasê,
che la devozion e l'afiet dal popul cristian a tindin
là che dutune cun te e je ancje la nestre umanitât.
Par Crist nestri Signôr.